

四庫全書

子部

欽定四庫全書

冊府元龜卷六百三十六 宋 王欽若等 撰

銓選部

考課第二

唐德宗建中二年六月門下侍郎平章事盧杞奏准六
典中書舍人給事中充監中外官考使重其事也今者
有知考使無監考使伏望依前置監中外官考使依奏
貞元元年九月以刑部尚書關播吏部侍郎班宏為校

內外官考使

十二月制六品以下本州申中上考者納錢一千文市
筆墨朱膠等者元置五分生利吏部奏見用有餘自今
以後其外官考錢並請勒停依奏

二年九月考功奏校京官外官考使准舊例差定聞奏
勅其校考使宜停其考課付所司准式校定

三年五月勅以停減天下官員其停官計日成考兩考
准舊成資准常式兩考以下至來年五月三十日處分

四年正月一日制戶口增加田疇廣闊者長吏加一階
縣令減選優與處分其額內官勿更注擬見任者三考
勒停

五年正月司勲員外郎判考功趙宗儒復行貶考之令
自至德已來考績失實朝官刺史悉以中上考褒之善
惡不別及是右司郎中獨孤良器殿中侍御史杜倫各
以過犯免官尚書右丞裴郁御史中丞盧召考之中上
宗儒抗令又貶良器及倫考居中中又祕書少監鄭雲

達考其同官昌裔入上下宗儒覆按其考降入中上以雲達褒進失中考之中以儆之又刺史覈其課效考之中上者不過五十人餘貶入中中褒貶稍明人知戒懼帝善之遷考功郎中

六年六月三日考功奏准天寶七載六月勅内外官初考無赴上日末考不具得替便注破不在校限

是月又奏諸使下兼憲官及檢校郎官并諸色官充職掌者竝仰本使每年具在使功課兼具考第申省

十一月制守宰之任弊在數更自今刺史縣令以四考為限

七年八月考功奏准考課令諸司官皆據每年功過行能定其考第及准開元天寶以前勅朝官每司有中上考亦有中中考自三十年來諸司竝一例申中上考且課績之義不合雷同事久因循恐廢朝典自今以後諸司朝官皆湏據每年功過行能仍比類格文定其昇降以書考第不得一例申中上考應諸司長官書考不當

三品已上具御牒上中書門下四品以下依格令各准所失輕重考

是月考功奏准諸司官皆據功過定其考等自至德後一切悉申中上考今請覆其能否以定昇降從之自諫議大夫給事中郎官有書中中考者尚書左丞趙退翁言前薦果州刺史韋誕坐贓廢請降其考校考使吏部尚書劉滋以退翁能言其過奏中上考

十二月校外官考使奏准考課令三品以上及同中書

門下平章事竝奏取裁注云親王及大都督亦同伏詳
此文則職位崇重考績褒貶有司皆合上奏今緣諸州
刺史大都督府長史及上中下都督都護等有帶節度
觀察使者方鎮既崇名禮當異每歲考績亦請奏裁其
非節度觀察州府長官有帶臺省官者請不在此限

八年七月右僕射崔寧書兵部侍郎劉廼上下考刑部
侍郎兼京官校考使班宏正議曰今夷荒靖難專在節
度尺籍伍符不校省司夫上多虛美之名下開趨競之

路上行阿容下必朋黨因削去之廼謝之曰廼雖不敏
敢掠一美以徼二罪乎

十月以刑部尚書劉滋為校外官考使吏部侍郎杜黃
裳為校京官考使給事中李選宜監京官考中書舍人
鄭珣瑜宜監外官考

九年七月制縣令以四考為限無替者宜至五考

十年二月刑部奏准建中元年正月十七日勅諸州府
五品以上正員及額內上佐宜四考停其左降官不在

此限者五品左降官既不許停祿料六品以下未復資
已經四考者未量移間其祿料伏望亦許准給勅下祿
料宜准天寶六載七月十四日勅處分餘依常式

憲宗元和十四年十一月考功奏自今以後應注考狀
但直言某色行能某色異政某色樹置某色勞效推斷
某色獄糾舉某色事便書善惡不得更有虛美閑言其
中以下考亦各言事狀竝不得失於褒貶如違據所失
輕重准令降書考官考又奏自今以後其有政能卓異

清苦絕倫者不在止於上下考限依奏又奏據寶應二年勅御史臺分察使及諸道觀察使訪察官吏善惡功過稍大事當奏聞者每年九月三十日具狀報考功功過雖小理當懲勸者按成即報考功至校日叅驗事迹以為殿最伏以近日功過都不牒報今後諸司不申報者州府本判官便與下考在京諸司追節級科處本判官校課日量事大小黜陟勅旨從之

穆宗元和十五年正月即位十二月尚書考功員外郎

權判郎中事李渤校定京官考請行昇黜上言曰宰臣
蕭俛段文昌崔植等當陛下君臨之初首任宰相安危
理亂決在此時况陛下思天下和平敬大臣禮功故未
有昵比左右侈蒲自賢之心而宰相之權宰相之事陛
下一以付之實宣化理千載一遇之時也此時若失恐
更無時而俛等上不能推至公明誠陳先王道德以諧
君心又不能正色匪躬振舉舊法復百司之本則教化
不立矣臣聞政之廢興在於賞罰俛等作相已來未聞

獎一人德義舉守官奉公者使天下在官之徒有所勸
又不能黜一人職事不理持祿養交者使戶祿之徒有
所懼如此則刑法不立矣邪正莫辨混然無章教化不
行賞罰不設天下之事復何望哉一昨陛下畋遊幸驪
山宰相與翰林學士是陛下股肱心腹宜皆知之俛等
不能先事未形忘軀懇諫而使陛下有忽諫之名流於
史冊是陷君於過也孔子曰所謂大臣者以道事君不
可則止若俛等言不行計不從湏奉身疾退不宜尸素

於化源進退戾也何所避辭其蕭俛段文昌崔植三人
并翰林學士杜元穎等竝請賜考中下御史大夫李絳
左散騎常侍張惟素右散騎常侍李益等諫幸驪山鄭
覃等諫畋遊是皆恐陛下行幸道途漸遠自此恣情無
度又思馬有銜繫不測之變風寒生疾之憂急奏無所
詣國璽委婦人中辛之手絳等能率御史繼以兩省官
大諫於朝有懇激事君之禮可以誠無言者其李絳張
惟素李益三人請賜上下考外特與遷官以彰陛下優

忠賞諫之美其崔元畧冠供奉官之首合考上下緣與于翬上下考于翬以犯贓處死准令湏降請賜考中中大理卿許李同任使于翬韋道沖韋正牧皆以犯贓或左降或處死合考中下然頃陷劉闢之亂棄家歸朝忠節明著今宜以功補過請賜考中中少府監裴通職事修舉合考中上以其請追封所生母而舍嫡母是明罔於君幽欺其先請賜考中下伏以昔者宰夫入寢擅飲師曠李調今愚臣守官請書宰相翰林學士下考上優

聖運下振頽綱故臣懼不言之為罪不懼言之為罪也
今其三品官考伏緣限在本月內進輒先具如前其四
品已下官績具條流聞奏狀入留中不下未幾渤以墜
馬傷足請告中書門下帖刑部郎中馮宿權判考功宿
以宰臣及三品已下官故事內校遂別封以進翰林學
士職居內署事莫得知請依尚書上考諫官御史亦請
仍舊竝書中上考乃與李渤所奏異矣國朝考課令凡
校考以一年善惡為上下郎中校京官四品以下得隨

事昇黜三品以上通名清望官每歲進名內定不在有司渤雖欲振舉官業然事無故實又通舉佗年事以定褒貶不達者以為朝廷盛事帝雖甚怒而宰相等引過救解然後得免焉尋出為處州刺史

長慶元年正月制自今郡守恪奉詔條清廉可紀四考與轉

李渤為考功員外郎穆宗初書宰相等下考長慶元年五月貶渤為處州刺史渤既請書宰臣等下考時人以

宰輔曠官不上疏陳列而越職釣竒非盡事君之道至是杜元穎等奏渤海直沽名動多狂躁遂出之

文宗太和元年正月勅諸道節度觀察使去任日宜具交割狀仍限新人到任一月日分析聞奏并報中書門下據新舊狀磨勘聞奏以憑殿最

二年十月吏部侍郎楊嗣復李宗閔書員外楊虞卿考上下至是左僕射平章事王播判云據楊員外課績事有司准勅見今推窮竝未申奏其間得失湏候聖裁遽

此直書豈為至敬所書考待進止

六年七月勅今後諸州五品長為推知者推知正授通計六考滿停其勒留官未滿六考停給課料者准此郤給

七年七月中書門下奏應諸州刺史除授序遷湏憑顯效若非責實無以勸人近者受代歸朝皆望超擢在郡理績無繇盡知或自陳制置事條固難取信或別求本道薦狀多是徇情將明典章在數名實伏請自今以後

刺史得替待去郡一箇月後委知州上佐及錄事參軍
各下諸縣取耆老百姓等狀如有興利除害惠及生人
廉潔奉公肅清風教者各具事實申本道觀察使簡勘
得實具以事條錄奏不得更為文飾其文狀仍與觀察
判官連署如事無可稱者不在薦限仍望委度支鹽鐵
分巡院周訪察各申報本使錄事如除授後訪知所舉
不實觀察判官分巡院及知州上佐等並停見任一二
年不得敘用如緣在郡賦私事發別議處分其觀察使

奉取進止所與吏皆稟法人獲乂安遷擢之時更無濫授制從之

八月制考課之法前王所重蓋以綜覈吏理勵精政途名實苟違將何沮勸宜准故事置内外知考使兼令中書舍人給事中各一人監考

九月以吏部尚書令狐楚為校內官考使中書舍人崔鄆為監內官考使以兵部尚書王起為校外官考使以給事中高銖為監外官考使行舊典也

開成四年六月河陽節度使李執方奏管內縣令有纔
經一考已替者失考績黜陟之義請無犯者留至三考
從之

宣宗會昌六年五月制刺史交代之時非因災沴大郡
走失七百戶已上小郡走失百戶已上者三年不得錄
使兼不得更與理人官增加一千戶已上者與超資遷
改仍令觀察使審勘詣實聞奏如涉虛妄本判官重加
懲責

大中元年正月制曰守宰親人職當撫字三載考績著在格言貞元之中頗有明詔縣令五考方得改移近者因循都不遵守諸州或得三考畿府罕及二年以此字人若為成政道途郡吏有迎送之勞鄉里庶民無蘇息之望自今湏滿三十六箇月永為常式

六年七月考功奏近年諸州府及百司官長所書考第寮屬竝不得知昇黜之間莫辨當否自今以後書考後但請勒各牒於本司本州懸於本司本州之門三日其

外縣官則當日下縣如有昇黜不當便任敷陳其考第
湏便改正然後申省如勘覆之後事無乖謬則論告之
人亦必懲殿又准考課令凡官人申考狀不得過兩紙
刺史縣令至於賦稅畢集判斷不滯戶口無逃散田畝
守常額差科均平廝宇修飾館驛如法道路開通如此
之類皆是尋常職分不合計課自今已後但云所勾當
常行公事竝無敗闕即得准職分無失及開田招戶辦
獄雪冤及新制置之事則任錄其事繇申上亦湏簡要

不得繁多又近年以來刺史皆自錄課績申省矜衡者則張皇其事謙退者則緘默不言自今以後其巡內刺史請並委本道觀察使定其考第然後錄申本州不得自錄課績申省又州府申官人覆得冤獄書殊考者其元推官人多不懲殿或云書下考至時又不提舉請自今以後書辨獄官人殊考日便湏書元推官下考如元推官自以為屈任經廉使及臺省陳論其官人先有殿犯官長斷云至書考日與下考者如至時不舉其本州

判官當書下考其所申到下考省司校其所犯如與令
式相符便校定申奏至勅下後竝湏各牒州府又近日
諸州府所申令錄課績至兩考三考以後并湏重具從
前功課申省以冀褒昇省司或簡勘不精便有僥倖自
今以後不得輒更具從前功績申上又近日諸州府所
申考解皆不指言善最或漫稱考秩或廣說門資既恥
令文實為繁弊自今以後如有此色竝請准令降其考
第又准考課令在中上以上每進一等加祿一季中中

者守本祿中下以上每退一等奪祿一季准令以此懲
勸事在必行近年以來與奪幾廢或有申請之處則言
無本色可支徒掛簿書竟無給與今案倉庫令支給糧
祿皆以當處正倉兌無倉之處則申省隨近有處支給
又無者聽以稅物及和糴屯收等物充令式昭然不合
隳廢自今以後每省司校考畢符牒到州後仰當時便
具昇降與奪事錄申請如違令式不舉明者其所錄官
請奪俸祿一季其已去任官進奪祿事竝請准令式處

分又准考課令官人因加戶內及勸田農并緣餘功進
考者於後事若不實縱經恩宥其考皆從追改追改之
事近皆不行自今以後竝請准令式處分其因此得官
者仍請追奪又諸道所申考解從前十月二十五日到
都省都省開拆郎官押尾後至十一月末方到本司開
拆多時情故可見自今以後伏請淮南曹及禮部舉選
解例直送當司開拆又從前以來應得考之人竝給考
牒以為憑據近年考使容易給牒不一或一人考牒數

處請給或數年之後方始請來自今以後校考勅下其得殊考及上考人省司便據人數一時興修寫考牒請准吏部告身及禮部春官牒每人各出錢收贖其得殊考者出一千文上考者出五百文其錢便充寫考牒紙筆雜用以前件事條等或出於令文或附以近勅酌情揣事不至乖張謹竝條例進上伏乞宣付中書門下請更叅詳苟俾至公乞賜收采仍請三年一度准舉選格例修定頒下勅考功所條流校考功事頗謂詳悉唯一

件難便允從近日俗尚矜能人少廉恥若榜門許其論告則自此必長紛爭當否之間固有公議其一件宜落
下餘依奏

懿宗咸通四年正月大赦節文邦伯之任郡守之官比
遣頒條當求共理近或不終年限非時多議替移其政
未成在理難責自此委中書待其三考方可再遷免吏
民迎送之勞表能否昇降之道除煩就省無尚於斯
十四年考功員外郎王徽以舊例考簿上中下字朱書

吏緣為姦多有揩改請以黑書從之

昭宗天祐元年四月制刺史縣令有勸課農桑招復戶口一倍已上於前者委本道觀察使條件奏聞當加進陟如貪墮不理害及於人者速使停替

後唐明宗天成元年十月吏部侍郎盧文紀上言請内外文武臣寮每歲有司明定考校將相乞廻御筆以行黜陟流下中書門下商量宰臣奏請施行從之

是月尚書考功條奏格例如後一准考課令諸内外文

武官九品以上每年當司長官考其屬官應考者皆具
錄一年功過行能議其優劣定九等考第京官九月三
十日已前校定外官去京一千五百里內八月三十日
已前校定三千里內七月三十日已前校定五千里內
五月三十日已前校定七千里內三月三十日已前校
定萬里內正月三十日已前校定本州定訖京官十月
一日送簿外官朝集使送限十月二十五日已前到京
考後功過竝入來年無長官次官考縣令已下及關鎮

戊官岳瀆令竝州考津非隸監者亦州考一准考課令
諸每年考簿集日考司校勘色別為簿具言功過京官
三品已上及同中書門下三品并平章事奏裁親王及五
都督府

五
大
都

四品已下及餘外官竝使人量定聞奏上考下考

奏單數仍畧狀進中考竝單名錄奏一准考課令諸每

年尚書省諸司得州牧刺史縣令政有殊功異行及祥

瑞災蝗戶口賦役增減當界豐儉盜賊多少竝錄送考

司一准考課令諸官人景迹功過應附考者皆湏實錄

其前任有犯私罪斷在今任者同見任法即改任應計
前任日為考者功過竝附其狀不得過兩紙州縣長官
須言戶口田地者不得過三紙注考正之最一最已上
有四善為上上一最已上有三善或無最而有四善為
上中一最已上有二善或無最而有三善為上下一最
已上有一善或無最而有二善為中上一最已上或無
最而有一善為中中職事粗理善最不聞為中下愛憎
任情處斷乖理為下上背公向私職務廢闕為下中居

官諂詐及貪濁有狀之類為下下若於善最之外別有可嘉及罪雖成殿而情狀可矜或雖不成殿而情狀可責者省校之日皆聽考官臨時量定一准考課令諸官人因加戶口及勸課農桑并緣餘功進考者於後事若不實縱經恩降皆從追改一准式校京官考限來年正月內外官考限二月內者所司至三月內申奏了畢伏以書校內外官考課逐年申送考簿各有程期近年已來諸道州府及在京諸司所送考解多是稽違自今後

所申送考簿如違格限二十日不到其本判官并錄事叅軍伏請各罰一百直本典勾官請委本道科責如違一月日已上不申到者本判官伏請罰二百直錄事叅軍量殿一選本典勾官請委本道重加懲斷在京諸司如違格限不關牒到者其本行人吏牒報御史臺請行追勘決責一准格應所使闕縣令計日成四考餘官計日成三考闕今後州縣官等並許終三十箇月成三考自上官後至年終但滿一百八十日便與成頭考次二

年即湏兩考滿足如頭考第二考全足即許計日成尾考方與三十箇月事理合同如過月限無替人到准上條處分者伏以每年書校官員考課格限則顯有舊條授上則難為定制但以每月之內皆有除移今准格且以六月內上為准一應申校內外六品已下赴選官員考課准格自上任後但滿一百八十日便與成頭考年終非書考時湏至來年准格書校時併申兩考如六月已前直至正月到任者自上任日至校考時頭考日足

即考後功過竝入來年如至書校時頭考欠日未成資
考亦至來年准格書校時併申兩考如六月已後至年
終上者竝至准格日收計一考有剩日不在重使之限
一應經考後合收次年以一周歲為限如未滿一年停
替者但及二百四十日與成如欠一日不在收計限一
應收尾考但經考後至去任時得及二百日與成如欠
日不在收計限如過月限無替人到竝准上條處分一
應申校內外赴選官員考課頭考湏具到任年月日自

上以來功過第二考湏具經考已後課績不得重疊計功其末考湏具得替年月日比類申降一應申校內外六品以下官員考第以去京地里遠逐年書校申送考解各有程期今後應內外赴選官員考第既准格依限逐年比較即不合更將州府及本司考牒為據其有已前罷任官員不計年限考第未經省校者如有州府及本司考詞考牒全備者欲據在任年月日簡勘省司給與牒知如在任之時州府及本司向來元不曾校給

牒只於牒錄歷子內批出考數者欲與簡勘解錄歷子內不豎過犯稱在任日并無公事遺闕證驗分明亦據在官年月日給與牒知如簡勘無憑者不在給牒之限其今年各准格赴集選人便合請給省校考牒直至南曹受納告亦給已竝許經所司投狀簡勘出給其考牒又准格湏奏下當年内出給如隔年者不在行使之限如或實有事故年内請給故難請自今後當年奏下勅考許至來年内請給如更違格限請一年與殿一選如

至三年外不請給者所司不在出給之限其已前校奏
下內外赴選官員考課其間有未曾請給考牒者竝合
投狀請給以備選曹磨勘如將來選人今任考第依前
故違格條不經省司勘校給牒及已曾奏校下勅考不
曾給考牒者南曹不在簡勘判成之限一應申校內外
官員考課文解湏依格限到省如申發後其間或有非
時事故停任省司無以得知請委本判官并錄事叅軍
專切提舉具事繇申省以憑點簡錄奏一准故事校考

舊條內外官員並校之時諸道差朝集使應考內即差中書舍人給事中監考伏自校勘不行往例全廢自今後省校之時伏請中書門下選差清望官兩員監校內外官員考課便同點簡申奏其合經過中書門下兩省准例各供宣黃請守舊規以為永制一應錄校內外官察考課如有過犯便降書下考如在任之日於常課之外別有異績可稱比之上下考如諸道州府及在京諸司固違格條不具錄在任事績功過依限比較申牒到

省其本判官并錄事叅軍及在京諸司本行並請准前
殿罰一應諸司諸色流外職掌人等准令本公司量其行
能功過立四等考第而勉進之今狀請准新定格內條
件逐年依限投狀各具在職功過書校考第簡勘錄奏
應諸司令史及勒留官丁憂不計有官無官並一百日
後舉追如願終喪不在追限除丁憂年一考不附奏次
年便許選數赴集其丁憂人仍牒考功及南曹終喪者
計三年憂諸色選人使上考減選其下考並合殿選並

注令錄銓曹勘驗只憑考功報簡多有差錯今請每年
考功申校上考及下考勅下後請具單名牒門下省及
申三銓關報南曹以憑勘會竝湏九月已前報畢勅旨
從之

三年四月祠部郎中王承弁請明書兩班考課顯示懲
勸時兩班考績虛有其名皆以恪勤匪懈清慎明著為
詞久無其實承弁雖奏終不改定

長興四年五月中書奏准天成元年五月二十七日勅

諸使府兩稅徵科詳斷刑獄校官吏考課合是觀察判官專判其一州諸縣徵官糾轄提舉合是錄事叅軍本職今後觀察判官錄事叅軍較量所屬州縣官吏據每年徵科程限刑獄斷遣戶口增減據州縣申報仔細磨勘詣實然後於本官牒內據事件收堅如官吏考課一事實其判官錄事叅軍候考滿日竝與酬獎別加職任如考課不實亦行殿罰如有水旱災傷處許奏聽勅旨從之

末帝清泰二年四月宰臣張延朗奏州縣官徵科賞罰
例縣令錄事叅軍正官一年依限徵科了絕加階二年
依限與試銜三年總及限與服色如攝令一年內了絕
仍攝二年三年內總及限與真命主簿一年二年如縣
令條三年總了別任使本判官一年加階二年改試銜
三年轉官本曹官省限內了絕與試銜轉官諸節級三
年內總了絕與賞錢三十千其賞罰依天成四年五月
五日勅從之

九月尚書考功上言今年五月中翰林學士程遜所上
封事內請自宰相百執事外鎮節度使刺史應係公事
官逐年書考較其優劣以前件考課究尋臺閣深遠歲
年若議興行宜憑往制具繇中書門下宰臣判設官分
職各有所司本公司自合將條格故實詳參更簡尋遠勅
條奏定為悠久緣本公司公事遂簡尋唐書六典會要考
課令書考第從之

三年五月右衛使兼判尚書考功郝瓊上言去年五月

詔中外官員自宰臣節度使已下竝逐年書考課計官員千餘當司人吏四人二人赴官又公用不足乞依三銓例當司歸司官逐月交賜紙筆糧錢詔考功人吏兩人依三銓例給及春冬衣兩分諸司不得為例

晉高祖天福二年正月勅外官內官陳力實關於共理或出或處藉才難執於常規近覩朝臣偶除外任三年替罷之後再來擬官之時不計新職之勤勞惟循舊官之資歷比藉幹濟翻成滯淹宜別立於規繩貴各期於

激勵宜今後應朝臣中有藉材特除外任者秩滿無遺
闕將來擬官之時在外一任同在朝一任昇進其就便
自求外職及不是特達選任者不在此限

六年五月詔曰王者行考績之文重為政之本若存功
課自有旌酬或仗鉞守方著安民之術或剖符刺部彰
恤物之仁凡著政聲悉聞朝聽邇者數州百姓舉留本
部長官遂涉道途徑趨京闕皆陳善治竝述公清或指
使而方來或感激而自至勞煩行役妨廢耕耘言念苦

辛倍深軫憫今後岳牧善政委倅二官條件奏陳必當
旌別勤勞審詳課最如不愆於名實固無悞於渥恩

少帝開運元年八月詔曰向者朝廷無事經費尚多今
則師旅方興支贍尤廣必資國力以濟軍需近以四海
災傷頻年饑饉賦租減少筦榷虧懸帑藏不充公私重
困今歲三時不害百穀用成所在流民漸聞歸業商旅
之人稍衆山澤之利咸通郡邑徵科自然容易務塲課
額必有增盈較量之間斷可知矣牧宰之任選擢非輕

至於阜俗康民豐財益國乃為本職固合用心苟能一躬親孜孜臨蒞必絕滯凝之事兼除僥倖之門副我憂勤顯爾政績將求課最湏設科條况藩侯郡守等皆是良臣各膺重委盡傾誠恪以奉國朝式當倚注之時宜示勸懲之道應天下諸州各以係省錢穀秋夏徵科為帳籍一季一奏一年賦稅及限更委在任一年次年又不稽逋聽三周年為滿三年皆得辦事即與別議陟遷如或纔到任所課績不前亦當即時罷替其間災沴

之地湏明具敷陳審其虛真別有處分於戲朕纘承大業于茲三年虔奉基局不敢失墜兢兢業業若履春冰小信未孚咎徵斯降旱蝗相繼連歲為災兵革未寧四方多事下慙黔首仰愧蒼穹所賴將相公卿元戎郡守或先朝宿舊或當代英賢送往事居始終如一分憂共治誠節彌堅倚賴既深傾輸亦至必能為國盡忠臨事公勤不更假於指縱固自知其陳力凡百有位宜體朕懷

漢隱帝乾祐二年太子中允侯仁寶上言諸州府長吏勸課農桑隨戶人力勝裁時桑棗小戶歲十本至二十本中戶三十至四十大戶五十至一百如能廣裁不限本數種訖本縣令佐親省之計數得替時交興受代者仍於歷子內批書省司以為考課

三年七月勅親人之任務在安民經國之規必資徵賦至於招添戶口增長稅租減選加階優有處分勸能行賞顯降勅文邇來論課績者甚多較虛實則未當外州

批上歷子南曹磨勘解繇空收招到編民莫見新添稅額蓋有折居耕種各立戶名或是避稅逃移併未歸業所以虛添農戶無益官租考課涉名未盡其善宜令吏部南曹自今後及已前應有令佐招添點簡出戶口據數湏本處戶合徵稅賦物數目於解繇歷子內一一開坐批書方得准天福八年三月十日勅條施行如不合前後勅例不在施行之限

周太祖廣順二年十二月二十八日勅節文其有省校

考牒如是奏下後滿三年不請給者宜令考功准先降
勅文不在出給之限

三年三月十四日勅起今後諸州府更有供申考簿違
格限申到者本判官并錄事叅軍各罰五十直其錄事
叅軍仍殿一選本勾押官典委本州并行科斷如違程
限一月已上不申到者仍令尚書考功催促候供申到
考帳依例施行所有科罰准前處分若是校考過時即
與次年依格奏校

是月尚書考功上言當司所納諸道考課文帳准格每年十月二十五日前考帳到京如違格限本處官吏各行殿罰其鳳翔府自廣順元年十月節度移文為考帳全不詳認格條遂申中書門下請勘今鳳翔府稱違格限二十餘日已決罰官典申到考帳當司准格違限不收勅鳳翔考帳違限本府各以科徵其考帳省司特與考校起今後諸州府更有違限者本判官錄事叅軍各罰五十直錄事叅軍殿中選典押本處科斷仍令省

司依時催促若校考過時即與次年校奏餘依前後格勅指揮又勅州縣官或特勅除授或非時有故停任員缺除官到任者緣赴任不拘期限申發考帳之時但滿一周年便與依例書校一考申省如書校時少欠日月即與次年附帳申校不得漏落考第姓名如或有違罪本道書考官吏

顯德五年閏七月尚書考功奏奉新勅起今年正月一日後授官並以三周年為月限閏月不在其內者當司

所書校內外六品下赴選官員考第今後以一周年校成一考如欠日不在計限滿三周年校成三考如考滿後未有替人在任更一周年與成第四考如欠日不在計限兼逐年湏具到任年月日自上已來課績功過第二考湏具經考後課績不得重疊計功其未考湏具得替年月日比類昇降自今年正月一日已前授官到任者欲准格例三十箇月書校三考今年正月一日後來授官到任者准新勅三周年為月限每一周年書校一

考閏月不在其內所有諸道州府校考申發考帳及當司校奏各依前後格勅施行應諸司諸色流內出身人等准格並湏待附申考近年不經奏考便至參選頗啓倖門應在司見役人等自今後逐年起六月初一日後正身於所司投狀請申校勞考省司據狀却牒本司勘會補奏年月日勅甲頭姓名見掌案分公事牒報省司將元狀檢勘同即與准例申校仍自此後湏逐年九月已前校奏了畢不在更與隔年併書之限其考牒本無

綾紙書寫勅例今後每年奏下逐人給省牒一紙使大
張紙書不在使綾紙及併年都給限據省校勅之日有
公事在外差出不虛即本司雜事湏具在職功過及出
外事錄牒報考功不得有妨逐年書校如不與申牒其
雜事令史量情科決仍殿一選如無故自不經省投狀
請奏校不在論訴之限者當司緣新勅促期限慮恐校
考遲違今後應合校考人請起自五月一日正身投狀
限十日畢至七月三十日前校奏了畢餘依元格施

行從之



冊府元龜卷六百三十六

欽定四庫全書

子部

冊府元龜卷六百三十七

四十一

詳校官中書臣朱文翰

侍讀臣孫球覆勘

總校官庶吉士臣何思鈞

校對官學正臣常循

謄錄監生臣王元弼

欽定四庫全書

冊府元龜卷六百三十七

宋 王欽若等 撰

銓選部

公望

平直

振舉

公望

銓衡劇地總覈九流所以辯進官材翊贊邦治降自漢人委授彌重莫不妙選明識登用能臣故有負高亮之姿振清正之望鑒擇髦儁動叶於至公抑退浮華靡私

於貴勢伴時材各適其用天下共稱其平詩云靖恭爾
位好是正直其是之謂與

魏賈誼為尚書典選舉多選舊名以為令僕論者以此
多誼

崔琰字季珪清忠高亮雅識經遠端方直道正色於朝
魏氏初載委授銓衡總齊清議十有餘年文武羣才多
所明拔朝廷歸高天下稱平

毛玠字孝先太祖為丞相玠為東曹掾與崔琰並典選

舉用皆清正之士雖於時有盛名而行不繇本者終莫得進務以儉率人繇是天下之士莫不以廉節自勵雖貴寵之臣輿服不敢過度太祖歎曰用人如此使天下人自治吾復何為哉文帝為五官將親自詣玠屬所親眷玠答曰老臣以能守職幸得免戾今所說人非遷次是以不敢奉命大軍還鄴議所并省玠請謁不行時人憚之咸欲省東曹乃共白曰舊西曹為上東曹為次宜省東曹太祖知其情令曰日出於東月盛於東凡人言

方亦復先東何以省東曹玠遷右軍師魏國初建拜尚書僕射復典選舉

先賢行狀曰玠雅亮公正在官清恪其典選舉拔貞實斥華偽進遜行抑

阿黨諸宰官治民功績不著而私財豐足者皆免黜停廢久不選用于時四海翕然莫不勵行至乃長吏還者

垢面羸衣嘗乘柴車軍吏入府朝服徒行人擬壺飧之潔家象濯纓之操貴者無穢欲之累賤者絕姦貨之求

吏潔於上俗移於下民到于今稱之

袁侃歷選部郎中號為清平

晉李重與李毅同為吏部郎時王戎為尚書重以清尚見稱毅淹通有智識雖二人操異然俱處要職戎以識

會代之各得其所

李喬為吏部清慎選舉號為廉平

阮放字思度為黃門侍郎選吏部郎在銓管任甚有稱績

盧欽為尚書僕射領吏部舉必以材稱為廉平

周馥遷吏部郎選舉精密論望益美

蔡克字子尼為東曹掾素有格量及居選官苟進之徒

望風畏憚

宋王惠為吳興太守少帝即位以蔡廓為吏部尚書不肯拜乃以惠代焉惠被召即拜未嘗接客人有與書求官者得轉聚置閣上及去職其封如初時談者以廓之不拜惠之即拜雖事異而意同也

謝莊代顏竣為吏部尚書竣留心選舉自强不息任遇既隆奏無不可而容貌嚴毅莊風姿甚美賓客喧訴常懼笑答之竟多不行時人為之語曰顏竣嗔而與人官謝莊笑而不與人官

梁徐勉為吏部尚書勉居選官彝倫有序常與門人夜

集客有虞嵩求詹事五官勉正色答云今夕止可談風
月不宜及公事故時人常服其無私又云勉為尚書僕射爰自小選迄于

此職常參掌衡

石甚得上心

到溉掌吏部尚書時何敬容以吏參選事有不允溉輒
相執敬容謂人曰到溉尚有餘臭遂學作貴人敬容日
方貴寵人皆下之溉許之如初溉祖彥之初擔糞自給
故世以為譏云

王泰為都官尚書能接人士士多懷慕每願其居選官頃之為吏部尚書衣冠屬望

王亮為吏部郎銓序著稱

後魏崔亮為給事黃門侍郎仍兼吏部郎領青州大中正亮自參選事垂將十年廉慎明決為尚書郭祚所委每云非崔郎中選事不辦

北齊楊愔為給事黃門侍郎兼吏部郎中武定末以望實之美起拜吏部尚書加侍中衛將軍侍學典選如故

辛術為吏部尚書遷鄴以後大選之職知名者數四五
有得失未能盡美文襄帝少年高朗所弊也疎袁叔德
沉密謹厚所傷者細楊愔風流辯給取士失於浮華唯
術性尚貞明取士以才器循名責實新舊叅舉管庫必
擢門伐不遺考之前後銓衡在術最為折衷其為當時
所稱舉如此

後周鄭孝穆魏大統中為散騎常侍時文帝東討除大
丞相府右長史封金鄉縣男軍次潼關命孝穆與左長

史孫儉司馬楊寬尚書蘇亮諮議劉孟良等分掌衆務
仍令孝穆引接關東歸附人士并品藻才行而任用之
撫納銓叙咸得其宜

薛端為吏部尚書端久處選曹雅有人倫之鑒其所擢
用咸得其才

隋高構仁壽初為吏部侍郎以公事免煬帝立召令復
位時為吏部者多以不稱去職唯構最有能名前後典
選之官皆出其下又云牛弘為吏部尚書高構為侍郎

最為稱職

陸彥師開皇初為吏部侍郎時承周制官無清濁彥師在職凡所任人頗甄別於士庶論者美之

唐杜如晦為吏部尚書尋為右僕射仍掌選事引用賢良甚獲當時之譽

劉林甫貞觀初為吏部侍郎初隋代赴選者以十一月為始至春即停選限所促選司多不究悉時選人漸衆林甫奏請四時聽選隨到注擬當時甚以為便時天下

初定州府及詔使多有赤牒授官至是停省盡來赴集
將萬餘人林甫隨才銓擢咸得其宜時人以林甫典選
比隋之高孝基

李安期前後三典選部頗為當時所稱

楊纂為吏部侍郎銓叙人倫稱為允當

高季輔為吏部侍郎凡所銓綜時稱允愜

裴行儉高宗朝為吏部侍郎與敬玄馬載同時典選十
餘年甚有能名時人稱焉

李敬玄為司列少常伯典選累年銓綜有序天下稱其能

姚璡武后時為天官侍郎善選補于今稱之

盧從愿睿宗初為吏部侍郎以中宗之後選司頗失綱紀從愿精心循理大稱平允其有冒名偽選及虛增功狀之類皆能擿發其事典選六年前後無及之者初高宗時行儉馬載為吏部最為稱職及是從愿與李朝隱同時典選亦有美譽時人稱曰吏部前有裴馬後有盧

李

韋沆為刑部尚書頻年典校京外官考使前後咸稱允當

宋璟為吏部侍郎同中書門下三品玄宗在春官又兼右庶子先是外戚及諸公主等干涉朝政請託滋甚崔湜鄭愔等相次典選皆為權門所制九流失叙迎用兩年員闕注擬不足更置比冬選人大為士庶所歎至是璟大革前弊取捨平允銓綜由是有叙

李林甫為吏部侍郎天下昇平每歲選人填委林甫修廢舉直甄別流品時議以為稱職改黃門侍郎

徐浩為都官郎中掌選嶺南以廉平稱

于部為北部郎中常署考第於吏部以公當稱

劉滋為吏部侍郎有經學善持論性廉潔効理嫉惡常掌選多所發擿更代詐偽者尤畏之

韋弘景為吏部侍郎銓錄平允權邪憚其嚴勁不敢干以非

崔郾為吏部員外郎銓叙之美為時所稱

後唐韋寂為水部員外郎判南曹移浚儀令累遷吏部
郎中復判南曹吏畏其明

平直

夫政之敗繇官之邪前典之深戒也若夫式叙流品銓
管人才漢魏以還實重其任乃有善於其職不懈其位
為官擇人抑華崇本清濁有別名實以覈寒素無下品
之歎浮薄杜私謁之徑不以親疎而易意不為勢力之

所奪介然不撓處事惟允考訖底績抱公滅私才能適用怨亦不作繇是當時號為得士天下無有滯才茲所謂邦之司直德服衆望守公率職之善者歟

後漢魯恭為光祿勳選舉清平京師貴戚莫能枉其正陳蕃為光祿勳與五官中郎將黃琬共典選舉不偏權富而為勢家郎所譖訴坐免歸

趙戩為尚書典選董卓數欲有所私授戩輒堅拒不聽言色強厲卓怒召欲殺之衆人悚慄而戩辭貌自若卓

悔謝釋之

魏諸葛誕為吏部人有所屬託輒顯其言而承用之後有當否則公議其得失以為褒貶自是羣僚莫不慎其所舉

晉荀顗為尚書時顗甥陳泰卒顗代泰為僕射領吏部顗承泰後加之淑慎綜核名實風俗澄清

李密犍為人為州大中正性方直不曲意勢位後失荀勗張華指左遷漢中太守諸生多以為冤

李重為吏部郎詢朝衆而斥華競存公平而塞私謁是以羣才固不畢舉

劉毅為青州大中正銓正人流清濁區別其所彈貶自親貴者始

張輔為御史中丞梁州中正刺史楊欣有姊喪未經旬車騎長史韓預強聘其女為妻輔貶預以清風俗論者稱之

江灌為吏部郎時尚書謝奕銓叙不允灌每執正不從

王彪之為吏部尚書時簡文以會稽王輔政有命用秣
陵令典安遠補句容令殿中侍御史奚朗補湘東郡彪
之執不從曰秣陵令三品縣耳殿下昔用安遠談者紛
然句容近畿三品佳邑豈可處卜術之人無才用者邪
湘東雖復遠小所用未有朗比談者謂頗兼卜術得進
殿下若超用寒悴當令人才可拔朗等凡器實未足充
此選

王蘊為吏部郎性平和不抑寒素每一官缺求者十輩

蘊無所是非時會稽王輔政蘊輒連狀白之曰某人有
地某人有才務存進達各隨其方故不得者無怨焉

宋王球為吏部尚書接客甚希不視求官書疏而銓衡
有序朝野稱之

庾炳之為吏部郎時王僧達舉兄錫不協訴家貧求郡
太祖欲以為秦郡炳之曰王弘子既不宜作秦郡僧達
亦不堪蒞民乃止

王琨為吏部郎吏曹選局貴要多所屬請琨自公卿下

至士大夫例為用兩門生江夏王義恭常屬琨用二人後復屬遣琨答不許

江湛為吏部尚書在選職頗有刻覈之譏而公平無私不受請謁論者以此稱焉

王僧綽為吏部郎叅掌大選究識流品諳悉人物拔才舉能咸得其分

南齊陸慧曉為吏部郎曹中有都令史歷政以來諮執選事慧曉任已獨行未嘗與語帝遣左右單景雋以事

謂問慧曉謂景雋曰六十之年不復能諳都令史為吏部郎也帝若謂身不堪便當拂衣而退帝甚憚之

梁張充為吏部尚書居選稱為平允

王泰為中書侍郎歷給事黃門侍郎竝掌吏部郎事俄而即真自過江吏部郎不復典大選令史以下小人求競者輻輳前後少能稱職泰為之通關求吏先至者即補不為貴賤請屬易意天下稱平

王僧孺為尚書吏部郎參大選請謁不行

何敬容為吏部尚書銓序明審號為稱職

褚翬居小選公清不為請屬易意號為平允

陳徐陵天康初為吏部尚書以梁末以來選授多失其所於是提舉綱維綜覈名實時有冒進求官誼競不已者陵乃為宣示之曰自古吏部尚書者品藻人倫簡其才能尋其門胄遂其大小量其官爵梁元帝承侯景之凶荒王太尉接荊州之禍敗爾時喪亂無復典章故使官方窮此紛雜永定時聖朝草創干戈未息亦無條序

府庫空虛賞賜懸乏白銀難得黃札易營權以官階代
於錢絹義存撫接無計多少致令員外常侍路上比肩
諮詢叅軍市中無數豈是朝章應其如此今衣冠禮樂
日富年華何可猶作舊意非所望也所見諸君多踰本
分猶言大屈未喻高懷若問梁朝朱領軍異亦為卿相
此不踰其本分耶此是天子所拔非闕選序梁武帝云
世間人言有目色我特不目色范悌宋文帝亦云人世
豈無運命每有好官缺輒憶羊元保此則清顯職不繇

選也秦有車府令趙高直至丞相漢有高廟令田千秋亦為丞相比復可為例耶既忝衡流應須粉墨所望諸賢深明鄙意自是衆咸服焉時論比之毛玠

後魏任城王澄為吏部尚書及車駕北巡留澄銓簡舊例自公侯以下訖以選臣動有萬數冗散無事澄品為三等量其優劣盡其能否之用咸無怨者

元順為吏部尚書時三公曹令史朱暉素事錄事尚書事高陽王雍雍欲以為廷尉評頗煩託順順不為用雍

遂下命用之順投於地雍聞之大怒昧爽坐都廳召尚書及丞郎畢集欲待順至於衆挫之順日高方至雍攘袂撫几而言曰身天子之子天子之弟天子之叔天子之相四海之內親尊無二元順何人以身成命拔棄於地順鬚鬢俱張仰面看屋債氣奔湧長歎而不言久之搖一白羽扇徐而謂雍曰高祖遷宅中土崩定九流官方清濁軌儀萬古而朱暉小人身為省吏何令為廷尉清宮殿下既先皇同氣且遵成旨日有短垣而復踰之

雍曰身為丞相錄尚書如何不用一人為官順曰庖人雖不治庖戶祝不越樽俎而代之未聞有別旨令殿下參選事順又厲聲曰殿下必如是順當依事以聞雍遂笑而言曰豈可以朱暉小人便相忿恨遂起呼順入室與之極飲順之毅不撓皆此類也

陸俟為給事中典選部蘭臺事當官而行無所屈撓封軌渤海人宣武帝時為考功郎中本郡中正渤海太守崔林入為吏部郎以凡考事于軌軌曰法者天下之

平不可以舊君故虧之也休歎其守正

韋崇為司州及河南邑中正崇頗尹衡品以平直見稱
楊懿為選部給事中有公平之譽

宋弁字義和廣平人為黃門侍郎兼司徒左長史為本
州大中正弁先與度支尚書李彪州里迭相祇好結管
鮑之交而以寒地處之殊不欲微相優假彪不以為恨
及郭祚為吏部彪與子志求官祚仍以舊地處之彪以
位經常伯又兼尚書謂祚應以貴遊拔之深用忿怨形

於言色時論以此譏祚祚每曰爾與義和至交豈能饒爾而怨我乎一云郭祚為吏部所用者皆量才稱職時人以此歸之

李叔虎渤海人為國子博士本國中正攝樂陵中正性清直甚有公平之稱

北齊趙彥深為尚書令凡諸選舉先令銓定提獎人物皆以行業為先輕薄之徒弗之齒也

辛術為吏部尚書文宣常令術選百員官參選者二三千人術題目士子人無謗讟其所旌擢後亦皆致通顯

陽休之為吏部尚書多識故事諳悉氏族凡所選用莫不才地俱允

後周薛端為吏部郎中自居選曹先盡賢能貴遊子弟才劣行薄者未嘗升擢之每啓文帝云設官分職本康時務苟非其人不如曠職帝深然之

隋盧愷為周小吏部染工上士王神歡者常以賂自進冢宰宇文護擢為計部下大夫愷諫曰古者登高能賦可為大夫求賢審官理須詳慎今神歡出自染工更無

殊異徒以家富自通遂與縉紳並列實恐維鶴之刺聞之外境護竟寢其事

韋世康為吏部尚書選用平允請託不行出為襄州刺史歷安州信州總管入朝復拜吏部尚書前後十餘年間多所進拔朝廷稱為廉平

高構為吏部侍郎時人以構好劇談頗謂輕薄然其內懷方雅特為吏部尚書牛弘所重後以老病解職時弘典選凡將有所擢用輒遣人就第問其可否

牛弘為吏部尚書其選舉先德行而後文才務在審慎
所進用多稱職

唐高士廉貞觀年為吏部尚書獎鑒人倫雅諳姓氏凡
所署用莫不人地俱允

韋承慶自天授以來三掌天官選事銓授平允海內稱
之

高季輔為吏部侍郎凡所銓叙時稱允當

崔元暉為天官侍郎介然自守絕於請謁為執政者所

忌轉文昌左丞選司令史乃設齋自慶武太后聞之復拜為天官侍郎

劉奇為吏部侍郎注張文成司馬鍾為監察御史二人因申屠場以謝之奇正色曰舉賢本自無私二君何為見謝

吉頊為吏部侍郎陸象先本名景初為揚州叅軍秩滿調選頊擢授睢陽尉時象先父元方亦為吏部固辭不敢當頊曰為官擇人至公之道陸景初才望高雅非常

流所及實不以吏部之子妄推薦也竟奏授之

姜晦為吏部侍郎性聰悟識理體舊制吏曹舍宇悉布
棘以防令史與選人交通及晦領選事盡除之大開銓
門示無所禁私引致者晦輒知之召問莫不首伏初朝
廷以晦改革前規咸以為不可竟銓綜得所賄賂不行
舉朝歎伏

席豫為吏部侍郎玄宗謂之曰以卿前為考功職事平
允故有此授豫典選六年有令譽

韋陟為吏部侍郎常病選人冒名接腳闕員既少取士良難正調者被擠偽集者冒進陟剛腸嫉惡風彩嚴正選人疑其有瑕者陟按聲盤詰無不首伏每歲皆贍得數百員闕以待淹滯常謂所親曰使陟知銓衡一二年則無人可選矣又有一致仕官叙五品陟判之曰青氈展慶竝不立班朱紱承榮無宜卧拜時人推其強直韋見素為吏部侍郎在職公平選士美之

苗晉卿為吏部侍郎拔異舉廢時稱平允

楊綰為吏部侍郎歷典舉選精覈人物以公平稱

奚陟為刑部侍郎知吏部選事銓綜平允有能名遷吏部侍郎所蒞之官時以為稱職

裴垍為吏部考功二員外郎時吏部侍郎鄭珣瑜請垍考調判垍堅守不為時力所奪考覈皆務才實

楊於陵為吏部員外郎判南曹時宰相有密親調習文書不如式於陵持而不與物論大歸之遷右司郎中後為吏部侍郎凡四周歲簡察奸吏調補平允至今人稱

之

崔郾為吏部員外郎不敢欺孤寒無援者未嘗留滯
銓叙之美為時所稱

孔緯昭宗時為吏部侍郎居選曹勸循格令權要有所
託私書盈几不之省執政怒之改太常卿

晉史圭為吏部侍郎分知銓事而圭素廉守大著公平
時有前樂城浩者年踰七十不能拜起有重臣達意
且令與官圭不允其請人甚嘉之

振舉

振廢滯拔英雋有司之職也故刈其翹楚形之於風什揚彼側陋著之於典訓乃有雅望著於紳綏精識善其人倫處選士之曹當持衡之重唯善所在靡遺於葑菲類能而使必適於轍輪得其辨論之方盡諸藻鑒之美繇是棫樸之詩載作邁軸之歎不興者焉

後漢許靖為尚書郎典選舉董卓秉政以漢陽周毖為吏部尚書與靖共謀議進退天下之士沙汰穢濁顯拔

幽滯進用潁川荀爽韓融陳紀等為公卿郡守拜尚書
韓馥為冀州牧侍中劉岱為兗州刺史潁川張咨為南
陽太守陳留孔仲為豫州刺史東郡張邈為陳留太守
吳李肅字傳恭為選部尚書選舉號為得才

晉山濤武帝時為吏部尚書前後選用周徧內外而竝
得其才濤再居選職十有餘年每一官缺輒啓擬數人
詔旨有所向然後顯奏隨帝意所欲為先故帝之所用
或非舉首衆情不察以濤輕重任意或譖之於帝故帝

手詔戒濤曰夫用人惟才不遺疎遠單賤天下便化矣
而濤行之自若一年之後衆情乃寢濤所奏甄拔人物
各為題目時稱山公啓事嵇紹以父得罪靖居私門濤
啓武帝曰康誥有言父子罪不相及嵇紹賢侔郤缺宜
加旌命請為祕書郎帝謂濤曰如卿所言乃堪為丞何
但郎也乃發詔徵之起家為祕書丞又胡原練習兵馬
濤稱其才堪邊任舉為太尉長史

李重為吏部郎務抑華競不通私謁特留心隱逸繇是

羣才畢舉拔用北海西郭湯卿邪劉珩燕國霍原馮翊
吉謀等為祕書郎及諸王文學故海內莫不歸心時燕
國中正劉沉舉霍原為寒素司徒府不從沉又抗詣中
書奏原而中書復下司徒叅論左長史荀組以謂寒素
者當謂門寒身素無世祚之資原為列侯顯佩金紫先
為人間通流之士晚乃務學少長異業年踰始立草野
之譽未洽德禮無聞不應寒素之目重奏曰按如癸酉
詔書廉讓宜崇浮競宜黜其有履謙寒素靖恭求己者

應有以先之如詔書之旨以二品繫資或失廉退之士
故開寒素以明尚德之舉司徒總御人倫實掌邦教當
務峻準評以一風流然古之厲行高尚之士或栖身巖
穴或隱迹丘園或克己復禮或耄期稱道出處默語惟
義所在未可以少長異操用疑其所守之美而遠同始
終之責非所謂儻人必於其倫之義也誠當考之州黨
之倫審之於任舉之主沉為中正親執銓衡陳原隱居
求志篤學好古學不為利行不要名絕迹窮山艱羈道

藝外無希世之容內全遜逸之節行成名立縉紳慕之
委質受業者千里而應有孫孟之風嚴鄭之操始舉原
先誥侍中領中書監華前州大中正後將軍嬰河南尹
軼去三年諸州還朝幽州刺史許猛特以原名聞擬之
西河求加徵聘如沉所列州黨之議既舉又刺史班詔
表薦如此而猶謂草野之譽未洽德禮無聞舍所徵簡
之實而無明理正辭以奪沉所執且應二品非所求備
但願定志窮山脩述儒道義在可嘉若遂抑替將負幽

邦之望傷敦德之教如詔書所求之旨應為二品詔從之

劉沉字道真燕國薊人太保衛瓘辟為掾領本邑大中正敦儒道愛賢能進霍原為二品及申理張華皆辭旨明峻為當時所稱

王濟太原中都人與同郡張楚友善為本州大中正訪問邑人品狀至楚濟曰此人非卿所能目吾自為之乃狀楚曰天才英博亮拔不羣

何攀居心平允蒞官整肅愛樂人物敦儒貴才為梁益二州中正引致遺滯巴西陳壽間又犍為費立皆西州名士竝被鄉間所謗清議十餘年攀申明曲直咸免冤濫

韓康伯為吏部尚書初與吳隱之隣居隱之母死康伯母每聞隱之哭聲必輟飧投杼為之悲泣謂康伯曰若居銓衡當舉此輩人及康伯為吏部隱之遂階清級宋沈演之為吏部尚書性好舉才尤濟屈滯

王僧綽為吏部郎叅掌大選究諸流品人物拔舉賢能咸得其分

南齊張岱為吏部尚書武帝為撫軍岱選東陽太守王績為長史呈選牒太祖笑謂岱曰此素望也

梁張緒仕宋為吏部郎叅掌大選後廢帝元徽初東宮罷選曹擬舍人王儉格外記室緒以儉人地兼美宜轉祕書丞從之

王瞻為吏部尚書瞻性率亮居選所舉其意多行劉之

遼年十五舉茂才任昉見而異之瞻常候任昉值之遼在昉坐昉謂瞻曰此南陽劉之遼學優未仕水鏡所宜甄擢瞻即調為太學博士

蕭子顯為吏部尚書謝蘭丁父憂毀瘠骨立服闋後子顯表其至行擢為王府法曹行參

張纘為吏部尚書初纘為吳興太守時陸雲公好學有才思先製太伯廟碑纘罷郡經途讀集文歎曰今之蔡伯喈也至都掌選言之於高祖召兼尚書儀曹郎又王

勵為河東王功曹史王出鎮京口勵將隨之藩纘時典選舉勵造纘言別纘嘉其風采乃曰王生才地豈可遊於外府乎奏為太子洗馬遷中書舍人纘居選其後門寒素有一介皆見引拔不為貴要屈意人士翕然稱之後魏李沖為吏部尚書典選房景伯少喪父以孝聞家貧傭書自給養母甚謹尚書盧淵稱之於冲冲拔為奉朝請句空祭酒

崔休為吏部郎中遷散騎常侍權兼選任休愛才好士

多所拔擢

李韶為吏部尚書時張普惠為步兵校尉免官故事免官者三載之後降一階而叙若才優擢授不拘此限孝明熙平中韶奏普惠有文有學依才優之例宜特顯叙勅除寧遠將軍司空倉曹叅軍朝議以不降階為榮

北齊楊遵彥為吏部尚書銓衡甚慎選舉秀才擢第罕有甲科任城王湝為定州刺史舉李德林秀才德林射策五條考皆為上授殿中將軍既是西省散員非其所

好謝病還都廢帝乾明初遭彥奏追德林入議曹

唐張銳為吏部侍郎高祖謂之曰今年選人之內豈無才用者卿可簡試將來欲縻之好爵於是銳以張行成張知運等數人應命時人以為知人

高季輔為吏部尚書韋思謙弱冠舉進士累補應城令及歲滿預選思謙在官頗有公事懲殿舊制多不進官季輔曰自居選部今始得此一人豈以小疵而棄大德特超授監察御史繇是稍知名

李敬玄為司列少常伯選人有杭州叅軍徐大玄者初在任時同僚有張惠犯贓至死太玄哀其母老乃詣獄自陳與吏同受贓惠數既少遂得減死太玄亦坐免官不調十餘年敬玄大嗟賞之擢授鄭州司功叅軍太玄繇是知名後官至祕書少監以德行為時所重者以為敬玄能舉善也

一云敬玄為吏部侍郎咸亨二年有楊炯王勃盧照鄰駱賓王竝以文章見稱

敬玄咸亨譽

裴行儉咸亨初為吏部侍郎典選十餘年甚有能名自

掌選及為大總管凡遇賢俊無不甄採

鄭果則天聖歷中為吏部郎注韓思復為太常博士元希聲為京兆士曹嘗謂人曰今年掌選得韓元二子則吏部不負朝廷矣

王丘立宗開元中為吏部侍郎拔擢山陰尉孫逖桃林尉張鏡微湖城丞張晉明進士王冷然李昂等不數年登禮闈掌綸誥焉

崔琳為吏部侍郎判銓日收選人盧怡裴敦復于孺卿

等十數人無何皆入臺省

衛次公為吏部侍郎選人有李績者徐有功之孫名在
默中次公召而問之曰子之祖先勲在王府豈限常格
竝優秩而遣之

冊府元龜卷六百三十七

欽定四庫全書

冊府元龜卷六百三十八 宋 王欽若等 撰

銓選部

不稱 謬濫 貪賄

不稱

天官之職銓管是司稽周禮理典之制舉魏氏官人之法必資公方之器藻鑒之能所以總百官而式九流也乃有性質凝滯才識駑下不能執守與時浮沉多所懷

私徇於情託無裁斷之用失品藻之方以高簡而自矜
惟酣醉以為適繇是輪轍失序衡鑑不明興非據之譏
負敗官之咎豈獨貽其身禍亦乃紊於國經布於簡書
可以為耻

魏時苗鉅鹿人為大官令領其郡中正定九品至於叙
人才不能寬大然紀人之短雖在久遠蓄之不置

晉王戎為吏部尚書以晉室方亂慕蘧伯玉之為人與
時舒卷無謇諤之節自經典選未嘗進寒素退虛名但

與時浮沉而已

畢卓為吏部郎常飲酒廢職

梁王亮仕齊為吏部尚書建武末尚書右僕射江祐管朝政多所進拔為士子肆亮自以身居選部每持異議始亮未為吏部郎時以祐齊明帝之內弟故深友祐祐為之延譽益為帝所器重至是與祐昵之如初及祐遇誅羣小放命凡所除拜悉繇內寵亮更弗能止外若詳審內無明鑒其所選用示資次而已當世不謂為能

任昉為吏部郎中參掌大選居職不稱尋轉御史中丞蕭子顯為吏部尚書性凝簡負才氣見九流賓客不與交言但舉扇一揮而已衣冠竊恨之

陳到字仲舉為左僕射參掌選事仲舉既無學術朝章非所長選舉引用皆出自袁樞性疎簡不涉世務與朝市無所親狎但聚財酣飲而已

後魏任城王澄為吏部尚書孝文曰王者不降佐於蒼昊皆拔才而用之朕失於舉人任許一羣婦人革竒事

當更銓簡耳任城在省為舉天下綱維為當署事而已
澄曰臣實署事而已孝文曰如此便令史足矣何待任
城

李神雋為吏部尚書意尚風流情在推引人物而不能
守正奉公無多聲譽有鉅鹿人李炎上書言神雋之失
天柱將軍爾朱榮曾聞補人為曲陽縣令神雋以階懸
不用榮聞大怒謂神雋自樹親黨排抑勲人神雋懼啓
求解官

宋弁為黃門郎司徒左長史時大選內外羣官弁定四
海士族弁專參銓量之任事多稱旨然好言人之陰短
高門大族意所不便者弁因毀之至於舊族淪滯人非
可忘者又申達之又為本州大中正姓族多所降抑頗
為時人所非

東魏襲常山王嶷孝靜時為尚書令攝選部嶷雖居重
任隨時而已

北齊赫連子悅為都官尚書以本官兼吏部子悅在官

惟以清勤自守既無學術又闕風儀人倫清鑒去之彌遠一旦居銓衡之首大招物議繇是除太常卿卒

袁韋脩為吏部尚書初馮子琮以僕射攝選婚嫁相尋韋脩常非笑之語人云馮公營婚日不暇給及自居選曹亦不免時論蓋地勢使然

寇猛為武衛將軍自以上谷寇氏得補燕州大中正而不能甄別士庶也

隋盧愷為禮部尚書權吏部尚書時預選者甚多愷即

授官皆作色而遣之

唐溫彥博太宗時為吏部郎中知選事意在沙汰多所
擯抑而退者不伏囂訟盈庭彥博惟騁辭辯與之相詰
終日喧擾為識者所嗤

戴胄為民部尚書兼檢校吏部尚書及在銓衡抑文雅
而獎法吏不適輪轍之用

楊纂為吏部侍郎抑文雅進黜吏觀時任數為時論所
譏

唐皎為吏部侍郎當引人銓問何方便穩或云其家在蜀乃注與吳復有云親老先任江南即唱之隴右論者莫能測其意

楊師道為吏部尚書師道貴公之子四海人物未能委練所署用多非其才而深抑勢貴及其親黨將以避嫌然亦無藻鑑之譽從征高麗及師還人有言其非典選之才乃轉工部尚書師道乞為太常卿從之

楊思玄高宗時為司列少常伯恃外戚貴待選流多不

以禮而排斥之為選者夏侯彪所訟而御史中丞郎餘慶彈奏免官

魏克已為吏部侍郎銓路喧譁大為多集人援引指擿貶為太子中允

鄧玄挺為吏部侍郎既不稱職甚為時談所鄙又時患消渴病選人因目為鄧渴作鄧渴詩榜衢路自有唐已來掌選之失未有如玄挺者坐此左遷澧州刺史遷晉州刺史召拜麟臺少監重為天官侍郎其失有甚於前

韋侍賈為吏部尚書素無才術志識凡下出自武官而
驟居選部凡所銓綜多為朝野所嗤鄙

許子儒為吏部侍郎性無藻鑑所視銓綜皆委令史縱
直謂曰汝平配也

後唐崔貽孫為吏部侍郎性好干人喜得小惠天官任
重昏耄罔知督目將暝猶以所欲託於選人銓管難虛
遂除禮部尚書致仕

謬濫

論材定官存於周制興廉舉孝著於漢典得人有進律
之褒濫進有絀爵之罰故天下慎法莫敢謬舉魏晉以
降其道駁喪條教所頒既殊於古銓選所屬復罕其人
靡能平心守正量才揆職繇是用捨徇意詞辯飾非或
觀時而任數或為朋而受賄俾夫補授失次資格差謬
多所抑損或成紛訴至有附會權勢親狎姦民上不能
資朝廷之聰明下則積山林之怨憤是使古道不復來
者喟然

漢王勲成帝時襲封印城侯坐選舉不以實免

魏何晏為尚書主選舉其宿與之有舊者多被拔擢

梁王亮為吏部尚書拘資次而已當代謂為不能

後魏李韶為吏部尚書在選曹不能平心守正通容而已議者貶之

崔亮為吏部尚書時羽林軍新害張彝之後靈太后令武官得依資入選官員既少應選者多前尚書李韶循常擢人百姓大為嗟怨亮乃奏為格制不問士之賢愚

專以停解日月為斷雖復官須此人停日後者終於不得庸才下品年月久者灼然先用沉滯者皆稱其能亮外甥司空諮議劉景安書規亮曰殷周以鄉塾貢士兩漢繇州郡薦才魏晉因循又置中正諦觀在昔莫不審舉雖未盡美足應十收六七而朝廷貢秀才止求其文不取其理察孝廉惟論章句不及治道立中正不考人才行業空辨氏姓高下至於取士之途不溥沙汰之理未精而舅屬當銓衡宜須改張易調如之何反為停年

格以限之天下士子誰復修厲名行哉亮答書曰汝所
言乃有深致吾乘時僥倖得為吏部尚書當其壯也尚
不如人况今朽老而居帝難之任常思用賢舉直以報
明主之恩盡忠竭力不為貽後之累昨為此格有繇而
然今已為汝所恠千載之後誰知我哉可靜念吾言當
為汝論之吾兼正六為吏部郎三為尚書銓衡所宜頗
知之矣但古今不同時宜須異何者昔有中正品其才
第上之尚書尚書據狀量人授職此乃與天下羣賢共

爵人也吾謂當爾之時無遺才無濫舉矣而汝猶云十
收六七况今日之選專歸尚書以一人之鑒照察天下
劉毅所云一吏部兩郎中而欲究竟人物何異以管闕
天而求其博哉今熟人甚多又羽林入選武夫崛起不
解書詩唯可彊弩前驅指蹤捕噬而已忽令垂組乘軒求
其烹鮮之効未曹操刀而使專割又武人至多官員至
少不可周溥設令十人共一官猶無官可授况一人望
一官何繇可不怨哉吾近面執不宜使武人入選請賜

其爵厚其祿既不見從是以權立此格限以停年耳昔
子產鑄刑書以救弊叔向譏之以正法何異汝以古禮
難權宜哉仲尼云德我者春秋罪我者亦春秋吾之此
指其繇是也但令當來君子知吾意焉後甄琛元脩義
城陽王徽相繼為吏部尚書利其便已踵而行之自是
賢愚同貫涇渭無別魏之失人從亮始也

楊愔超拜吏部尚書典選二十餘年獎擢人倫以為已
任然取士多以言貌時致謗言以為愔之用人似貧士

市瓜取其大者惜聞不以屑意

馮子琮為右僕射仍攝選子琮微有識鑒及位望轉隆宿心頓改擢引非類以為深交縱其子弟官位不依倫次又專營婚媾歷選上門例以官爵許之旬日便驗許子儒則天時為天官侍郎不以藻鏡為意有令史句直是其腹心每注官多委令下筆子儒但高枕而臥語句直云平配繇是補授失次無復綱紀道路喧然以為口實是時則天臨朝引見風俗使舉人無賢愚咸加擢用高者試鳳閣舍人給事中次或試員外郎侍御

史補闕拾遺校書郎故時人為之謗曰補闕連車載拾
遺平斗量杷椎侍御史脫脫校書郎試官之起自茲始
宋遙玄宗時與苗晉卿俱為吏部侍郎天寶二年貶遙
為武當郡太守晉卿為安康郡太守是時海內晏平選
人萬計委有司考覈書判詔重其事兼命他司考之務
求其實遙與晉卿苟媚朝廷又無廉潔之操取舍渝濫
甚為當時所醜有張奭者御史中丞倚之子不辯菽麥
假手為判時升甲科會下第者常為薦令以其事白于
范陽節度使安祿山祿山恩寵崇盛謁請無時因具奏

之帝乃大集登科人御花萼樓親試升第者十無一二
焉輿手持試紙竟日不下一字時謂之曳白帝大怒遷
晉卿既受責乃貶倚為淮陽郡太守制曰庭闈之間不
能訓子選調之際乃以託人時士子皆以為戲笑或託
於詩賦諷刺考判官禮部郎中裴朏起居舍人張烜監
察御史宋昱左拾遺孟朝皆貶官嶺外

韋陟天寶中為吏部侍郎陟風神高遠以門地自負時
以選賢拔能為已任博采浮薄不拘於行屢以此失人

出為襄陽太守

楊國忠天寶中以便僻取宰相欲其能事皆出於己猶兼吏部尚書故事吏部置三銓尚書侍郎分掌選事三注三唱自春及夏纔終其事國忠使猾吏於私第暗定官員集百僚於尚書省對注唱一日令畢以誇神速資格差謬無復倫序乃令其所昵京兆尹鮮于仲通中書舍人竇華侍御史鄭昂之徵賂於選人於尚書省門立碑以頌己之德

崔渙肅宗至德初為黃門侍郎平章事時未復京師舉選路絕詔渙充江淮選補使以收遺逸渙選士惑於聽受又為下吏所鬻濫進者非一以不稱職聞乃罷知政事為王傅

徐浩代宗朝為吏部侍郎坐以妄第冒選俾侍郎薛邕注授京尉為御史大夫李栖筠所彈奏坐貶潮州別駕令狐峘大歷中為刑部員外判吏部南曹時劉晏為尚書楊炎為侍郎峘以晏舉分闕必擇其善者與晏而以

惡者與炎

劉滋為刑部尚書德宗貞元九年御史中丞韋貞伯劾奏吏部貞元七年冬以京兆府踰濫解選已授官總六十六人或有不到京銓試懸受官告又按選格銓狀選人自書試日書跡不同即駁放殿選違格文者不復驗及降資不盡或與注官伏以承前選曹乖謬未有如此遂使衣冠以貧乏待闕奸濫以賄賂成名非陛下求才審官之意繇是滋以前任吏部尚書及吏部侍郎杜黃

裳皆削一階

陳歸貞元中為考功員外郎充嶺南選補使選人流放
注官美惡違背令文唯意出入復供求無厭郵傳患之
監察御史韓泰奏劾其罪配流恩州

權德輿貞元中為吏部侍郎吏誤用官闈改守太子賓
客

鄭絅文宗時為吏部尚書丁公著為工部侍郎知選事
太和二年閏三月己亥都省奏落下吏部三銓甲內今

春注超資官凡六十七人勅都省所執是格銓司所引
是例互相陳列頗以紛紜所貴清而能通亦猶議事以
制今選期已過方此爭論選人可哀難更停滯其三銓
已授官都省落下竝依舊注與重團奏仍限五日內畢
其中如官超一資半資比格令已令據稍優者至後選
日量事降折尚書侍郎注擬不一致令都省以此興詞
鄭絪丁公著各罰一季俸東銓所落人數較少楊嗣復
罰兩月俸其今年選格仍分明標出近例有可行者收

入格不可者於格內書破則所司有文可守選人無路
僥幸時尚書左丞韋弘景以吏部注擬不公選多超資
授官糺按其事落下勅申吏部引例以為據選人革又
惜官已成道路沸騰日接宰相喧訴遂降此勅

楊虞卿為吏部員外郎太和二年十二月御史臺奏准
勅推勘踰濫官都六十五人應取受錢物偽出售身籤
符賣鑿空偽官令赴任南曹令史李賓等六人及賣鑿
空偽官人許稜等共取受錢都一萬六千七百四十貫

文又據李賓等欵稱去年三月已後商量斂錢三千貫
文與吏部員外郎楊虞卿廳典溫亮囑求楊虞卿不舉
勘濫官事得楊虞卿狀虞卿跡忝郎署為明天子舉偽
捕奸幸無差謬今李賓之輩結黨構虛而云商量斂率
甚明用此致尤誰則無罪據李賓欵本與溫亮錢物囑
求虞卿不舉踰濫官者若虞卿遂不舉勘則小吏卜射
計行今虞卿簡舉偽官牒臺推勘於公事足以自明緣
溫亮在宅外居住於李賓處取受虞卿無繇得知簡下

不明伏候嚴責勅李賓等八人並偽造印符構賣巨蠹
推窮盡法伏斷死刑宜付京兆府各決痛杖一頓處死
馬羽卿等一十二人引致梯媒合成奸計各決六十配
流嶺外楊虞卿勾舉雖則盡心簡下終是無術親吏逃
逸贓狀未明量罰兩月俸料踰濫官六十五人內已付
所司者速令詳斷見勘具申奏其贓及偽印等並付所
司准法處分

後唐明宗長興元年七月吏部南曹奏磨勘南郊行事

官前守濮州范縣主簿李範是同光元年不納告身人
數准勅終身不齒今又冒名於四方館行事前河南府
長水縣主簿趙知遠使兄為父蔭行事者勅旨李範已
該恩赦特放罪收納文書趙知遠以兄為父未之前聞
既遇郊禋特從恩宥出身歷任文書付所司焚毀放罪
勒歸鄉貫本道長吏與改昭穆奏聞

貪賄

彌綸治典銓綜多士周官冢宰之職也若乃端己以居

位潔身以率下旌別淑慝澄汰流品使朝有多士國無
倖人斯可謂官修其方矣若乃名浮於實言不顧行蹟
貨以自穢凜官而靡懼冒黜幽之典貽敗類之咎歷代
而下實繁有徒論而次之用戒於後

宋庾炳之字仲文為吏部尚書領選既不緝衆論又頗
通貨賄用少府卿劉道錫為廣州刺史道錫至鎮餉白
檀牽車炳之性好潔常自乘馬或以白文帝帝見問曰
道錫餉卿小車裝飾甚麗有之乎炳之懼起謝

梁劉孝綽為吏部郎在職頗通贓貨為從弟尚書左丞
覽所劾奏免官

何敬容為左僕射參掌大選通苞苴餉餽無賄則畧不
交語

後魏李宣茂孝文時為司空府司馬兼定州大中正坐
受郡中鄉人財貨為御史所劾除名為民

楊尼為國子祭酒兼幽州中正後除平北府長史帶漁
陽太守未拜坐為中正時受鄉人貨免官

元暉常山王遵之孫宣武時為吏部尚書納貨用官皆有定價大郡二千足次郡一千足下郡五百足其餘授職各有差天下號曰市曹

皇甫璠孝明時為吏部郎性貪婪多所受納鬻賣官吏皆有定價

元修義汝陰王天錫之子為吏部尚書在銓衡唯事貨賄授官大小皆有定價時中散大夫高居者有旨先叙上黨郡缺居遂求之修義私已許人抑居不與居大言

不遜修義命左右牽曳之居對大眾呼天唱賊人問居
曰白日公庭安得有賊居指修義曰此座上者違天子
明詔物多者得官京師白刦此非大賊乎修義失色居
行罵而出後欲邀車駕論修義罪狀左僕射蕭寶寅諭
之乃止

元世雋任城王澄之孫出帝時為吏部尚書居選曹不
能厲心多所受納為中尉所彈坐免官

北齊段孝言為吏部尚書既無深鑒又待物不平抽擢

之徒非賄則舊

馮子琮後主時為吏部尚書其妻胡太后妹也恃親放縱請謁公行賄貨填積守宰除授先定錢帛多少然後奏聞其所通致事無不允子琮亦不禁制

唐鄭元毓高祖時為選部郎中以贓犯處極刑

李義府高宗時為司列太常伯本無藻鏡才怙武后之势專以賣官為事補授失次人多怨言

李元恭中宗時以大理少卿為長寧安樂二公主所引

用令知吏部侍郎分往東都掌選事亦以贓汙聞於天下故時人為之語曰長寧安樂竝狂顛既教翻地亦翻天賣弄大家猶未足便使元恭來取錢

鄭愔諂事武三思及韋氏悖逆庶人歷選吏部侍郎愔掌選專以賣官為務人多怨讐時京師大旱為之語曰殺鄭愔天必陰其為人所惡如此

崔湜為中書舍人與鄭愔同掌選賣官鬻獄一時巨蠹並為御史所彈中宗勅所司以理勘問勿加窮迫繇是

希旨無所發明然猶斷情配流嶺南湜貶江州司馬而更授湜襄州刺史愔江州司馬

李彭年玄宗時為吏部侍郎坐贓伏罪制曰彭年幸以資序累登清貴委之銓綜任以權衡不能徇公滅私持平守直而乃貪財敗類黷貨無厭既玷清朝有冒法度頃令推鞫皆自歎承據其罪名合當誅死但以陽和布令善貸好生特舍嚴刑俾從流竄宜除名長流嶺南臨賀郡仍即差綱馳驛領送朕以為制理之本期返淳風

庶叶至公期於不犯永言議罪良用撫然且陳力就列
本於正已從事効官義存守法為惡者與衆共棄務善
者以才必升凡百庶僚深宜自勉立身之道可不慎歟
彭年先朝宰臣慎遠之孫也以吏才知名掌選七年好
聚財無廉潔之操而善接待選人惟贖貨無厭人多怨
之至是睢陽太守路齊暉之子曰畿納絹千足求官為
選人所發制下有司訐鞫彭年引紙稱伏贓狀狼籍遠
近恥之咸以為戒

陳歸德宗時為考功員外郎充嶺南選補使選人流放
注官美惡違背令文以意出入復供求無厭郵傳患之
監察御史韓泰奏劾得罪配流恩州

冊府元龜卷六百三十八